

茶
香
室
叢
鈔

茶香室三鈔卷十二

德清俞樾

殿門文武官

宋沈括夢溪筆談云天官掌舍無宮則供人門今謂之殿門文武官極天下長人之選八人上御前殿則執鉞立于紫宸門下行幸則爲禁闈門行於仗馬之前又有衡門十人隊長一人選諸武力絕倫者爲之上御後殿則執搨東西對立於殿前亦古之虎賁人門之類按余於續鈔卷八載明代直殿將軍之制今乃知宋已有此也

又按唐制諸州有貢長人之事余叢鈔第五已載之今乃知有此用也

鎮殿將軍

宋孟元老東京夢華錄云正旦大朝會車駕坐大慶殿有介冑長大人四人立于殿角謂之鎮殿將軍

梁陶宏景真誥云傅道流北地人漢靈帝殿中將軍則漢時已有殿中將軍之名矣陶隱居謂漢官無正殿中將軍或應中郎將也

朝集院

宋王栴燕翼貽謀錄云真宗置朝集院於朱雀門外詔

陞朝官以上到闕並館于院中官給公券出入則乘馬
開封府差兵士隨直惟可至廟堂省部銓曹官廳而已
雖欲出入市廛不可得也故陞朝官以上造朝則先匿
於親戚故舊之家俟所幹置悉備方敢報閤門放見閤
門卽日關報朝集院開封府人馬卽至迎入院中同院
士大夫日夕游從情如兄弟或商榷文字或詢問風土
其況味與栖栖逆旅者大不侔矣按此亦見宋時待士
大夫之厚

戒民集

國朝龔煒巢林筆談云張忠定公詠每斷獄必有判語

蜀中鑛版謂之戒民集

逢辰錄

宋王明清揮麈後錄云錢文僖惟演嘗纂書名逢辰錄
排日盡書其父子承恩榮遇及朝廷盛典極爲詳盡

京朝官喝道

國朝王士禎香祖筆記云京朝官三品以上在京乘四
人肩輿與前藤棍雙引喝道四品自僉都御史以下止
乘二人肩輿單引喝道宋人喝道皆云某官來以便行
人迴避明代閣臣入直呵殿至聞禁中今則至棋盤街
左右卽止凡八坐皆然行人亦無迴避者矣又云今京

官四品如國子監祭酒詹事府少詹都察院僉都御史
騎馬則許開棍喝道肩輿則否按此猶可見 國初時
京朝官威儀之盛

又云子同年徐敬庵由僉都御史巡撫山東出都日騎
馬開藤棍此舊例也凡巡撫入京多乘二人肩輿亦不
開棍喝引按今督撫入京無不四人肩輿矣開棍則否
京官乘肩輿

國朝戴璐藤陰襍記云京官向乘肩輿杜紫綸詔始乘
驢車嗣後有騾車余已卯入都見京官騾車多而驢車
少然幃幔樸素且少開旁門者今則無不旁門而布幃

日少矣

又一條云昔正陽門專許輿入車不準行時京官無一
乘車云按此可見百餘年來風俗之異余道光二十五
年入京師見京官尙書以上皆肩輿侍郎閣學則坐車
而車皆開旁門綠呢幃幔與庶僚異至光緒十二年余
送孫兒陞雲入都會試寓潘家河沿杜門不出而九列
諸公頻有見過者然綠幃旁門之車不復見矣

明劉侗帝京景物略云都城牡丹時無不往觀惠安園
者客多乘竹兜周行塍間遞而覽觀日移晡乃竟按此
則明時尚有竹兜今安得有此邪

明代駙馬家有學錄

國朝朱彝尊靜志居詩話云明初駙馬家有學錄嘉靖六年以禮部主事金克厚授都尉謝詔經書後遂因之主事教習駙馬者爾和其一也

張敬字爾和

宰相罷歸自稱前鄉貢進士

宋施德操北窗炙輅錄云杜祁公罷相歸鄉里書謁刺前鄉貢進士

明代閣臣止稱老爺

明高拱病榻遺言云至真空寺有親故以飯相送者予下車見一吏持文書隨入予問何人是何文書吏云此

老爺馳驛勘合也張爺已稟旨準馳驛矣按高拱以大
學士罷歸止稱老爺所謂張爺者張居正也

子弟居相位宜尊禮父兄

宋王明清揮塵前錄云元祐中呂微仲當軸其兄大忠
自陝漕入朝微仲虛正寢待之大忠辭以相第非便微
仲云界以中雷卽私家也卒從微仲之請時安厚卿亦
在政府父日華尙康甯且具慶焉厚卿夫婦偃然居東
序時人以此別二公賢否按安厚卿之無禮不足言至
呂微仲事可見北宋時家法之嚴漢田蚡言漢相尊不
可以兄故私撓失之矣

少年宰相

明李日華六硯齋筆記云宋南渡後呂頤浩罷相范宗尹繼之年纔二十自古少年宰相無踰之者按宋史本傳云時年三十近世宰相年少未有如宗尹者此作二十誤然宗尹曾汙張邦昌僞命相業亦無足觀卒年止三十七則亦不足爲美談也

元微之拜相綸軸

宋王明清揮麈前錄云台州有筆吏楊滌者言其外氏唐元相國之裔一日持告身來乃微之拜相綸軸也銷金雲鳳綾新若手未觸白樂天行并書後有畢文簡夏

文莊元章簡諸公跋識甚多尋聞爲秦燔所取
又云丹陽呂城閘北委巷竹林中有李格秀才者自云
唐宗室系本大鄭王房出其遠祖武德正觀以來告命
敕書凡百餘亦有辭少保顏魯公書者奇甚

翰林清苦

宋沈括夢溪筆談云舊翰林學士地勢清切皆不兼他
務文館職任自校理以上皆有職錢惟內外制不給楊
大年久爲學士家貧請外表辭千餘言其閒兩聯云虛
忝甘泉之從臣終作莫敖之餒鬼從者之病莫與方朔
之飢欲死按此則翰林清苦自昔然矣

太守燕履

明李日華紫桃軒襟綴云人知葉令王喬之舄爲雙舄不知晉南海太守鮑靚之履爲雙燕靚爲南海時葛稚川隱羅浮靚每密過之譚論達旦始去門無車馬之跡獨雙燕往還則其雙履也以舄屬令以燕屬守特爲拈出按縣令舄舄人人知之太守燕履未見有用者竹嬾拈出後知者仍少也

選人家狀

宋錢易南部新書云吏部常式舉選人家狀須云中形黃白色少有髭或武選人家狀云長形紫黑多有髭按

今制考試年貌冊卽本此

宋王明清揮麈前錄云本朝及五代以來吏部給初出身官付劄不惟著歲數兼說形貌如云長身品紫棠色有髭髯大眼面有若干痕記或云短小無髭眼小面癢痕之類以防僞冒元豐改官制始除之靖康之亂衣冠南渡承襲僞冒不可稽考乃知舊制不爲無意也

親屬迴避

國朝韓泰華無事爲福齋隨筆云南史傅隆傳遷尙書左丞以族弟亮爲僕射總服不得相臨徙太子率更令此卽今之迴避唐賈敦頤爲瀛州刺史弟敦實爲饒陽

令舊制大功之嫌不連官朝廷以其兄弟治行相高故不徒以示寵此兄弟不迴避之始

功加

國朝禮親王嘯亭祿錄云八旗定制凡從軍有功者視其功之優次與之功牌分三等級凱旋日兵部計功與之世職綠營則有功加之目凡臨陣奮勇者與之功加一次然核計功加二十四次始敘一雲騎較之八旗功牌殊爲屈抑按今軍營概用功牌亦與初制異至功加之名世無知者不知廢於何時也

金帶關子

宋陸游老學庵筆記云宣和閒親王公主及他近屬戚里入宮輒得金帶關子得者旋填姓名賣之價五百千雖卒伍屠酷自一命以上皆可得按宋時所謂關子殆卽今之空白執照也

就山封侯

宋龔頤正芥隱筆記云河南志盧元明侯山記云漢有王元者隱於此山景帝再徵不屈就其山封侯因以爲名唐宋之間侯山詩王元拜隱侯按此事不見漢書疑無其事姑以爲山居美談耳

監生行加屏風

明權衡庚申外史云大興國子監諸生日啖籠炊粉羹
一人之食爲鈔五兩行加屏風以障市人按屏風之制
當如步障然此誠優異之至矣

日本真人

宋錢易南部新書云日本國大臣曰真人猶中朝戶部
尙書

按光緒十年有日本國大藏省專修漢學學生井上陳
政來受業於門下言大藏省卽中國之戶部其參議兼
大藏卿曰松方正義者卽中國之戶部尙書也與古稱
真人異矣

茶室三鈔卷十三

德清俞樾

唐科目

明李日華六硯齋二筆云唐設諸科取士其名隨時起
立今悉錄之志烈秋霜科幽素科詞殫文律科岳牧科
詞標文苑科蓄藻之思科抱儒素之業科臨難不顧徇
節甯邦科長材廣度沈跡下僚科文藝優長科絕倫科
拔萃科疾惡科翼黃科才膺管樂科才高位下科材堪
經邦科賢良方正科抱器懷能科茂才異等科文以經
國科藏名負俗科文經邦國科藻思清華科興風興化

科道侔伊呂科手筆俊拔超越輩流科直言極諫科哲
人奇士逸淪屠釣科良材異等科文史兼優科文儒異
等科博學通議科文詞雅麗科將帥科武足安邊科高
才沈淪草澤自舉科才高未達沈迹下僚科博學宏詞
科多才科王霸科知謀將帥科文詞秀逸科風雅古調
科詞藻宏麗科樂道安貧科諷諫主文科文詞清麗科
經學優深科高蹈邱園科軍謀越眾科孝弟力田聞於
鄉閭科博通墳典達於教化科識洞韜略堪任將帥科
清廉守節政術可稱堪任縣令科詳明政術可以理人
科才識兼通明於體用科達於吏理可使從政科軍謀

宏達才任將帥科詳明吏治達於教化科按此諸科命
名多有可議者蓄藻之思疑脫一麗字

宋時賣省元賦

宋釋文瑩湘山野錄云歐公撰石曼卿墓表蘇子美書
邵餽篆額山東詩僧祕演力幹歐蘇囑演曰鐫訖且未
得打竟以詞翰之美演不能卻歐公於定力院見之問
寺僧何得曰半千買得歐怒詬演曰吾之文反與庸人
半千鬻之何無識之甚演曰學士已多他三百八十三
矣歐愈怒演曰公豈不記作省元時庸人競摹新賦叫
於通衢復更招呼曰兩文來買歐陽省元賦今一碑五

百價已多矣歐因解頤按此知宋賣省元賦其價甚廉三百八十三加兩文謂之半千者其時猶太平興國之制以七十七爲百也

一蘇召試事

宋李廌師友談記云東坡云頃同黃門公初赴制舉之召是時同召試者甚多一日相國韓公與客言曰二蘇在此而諸人亦敢與人較試何也此語旣傳於是不試而去者十八九矣

又云東坡云國朝試科目亦在八月中旬頃與黃門公旣將試黃門公忽感疾相國韓魏公知之輒奏上曰今

歲召制科之士惟蘇軾蘇轍最有聲望聞蘇轍偶病未
可試如此人兄弟中一人不得就試甚非眾望欲展限
以俟上許之凡比常例展二十日自後試科目並在九
月蓋始於此按以一士之病至展試期真異數矣

又云王仲薏承事字豐甫相國郇公之子也昔爲薦言
東坡應舉時郇公以翰林學士知舉得其論與策二真
本論卽刑賞忠厚之至也凡三次起草雖藁亦結塗注
一其慎如此論卷爲道人梁冲所竊今所存惟策藁爾
按此似宋時試卷已備真草又云藁亦結塗注一豈草
藁亦具塗注字數邪

呂文靖試卷

宋王栾燕翼貽謀錄云試場所問本經義疏不過記出處而已如呂申公試卷問子謂子產有君子之道四焉所謂四者何也答曰對其行己也恭其事上也敬其養民也惠其使民也義謹對試卷不謄錄而考官批于界行之上能記則曰通不記則曰不十問之中四通則合格矣其誤記者亦只書曰不全不能記答曰對未審謹對按此可見宋制試經義之寬呂文靖試卷余已記於續鈔第十而未得其詳故又錄此

崇德莫氏五子登科

范石湖詩集有寄題莫氏椿桂堂詩原注云莫氏五子皆登科居崇德縣沈欽韓注引輿地紀勝云五桂坊在崇德縣莫琮有五子俱登儒科邑宰爲立五桂坊周必大書謝諤爲記按崇德卽今石門縣也康熙元年改今名

探花詞

金元遺山詩集有探花詞五首第四首云六十人中數少年風流誰占探花筵阿欽正使才情盡猶欠張郎白玉鞭自注云李欽用二十七歲張夢祥少一歲又未婚按先生宣宗興定五年進士詩卽是年作也

金人科舉之法

宋洪皓松漠紀聞續云金人科舉先於諸州分縣赴試詩賦者兼論作一日經義者兼論策作三日號爲鄉試悉以本縣令爲試官預試之士惟襍犯者黜榜首曰鄉元亦曰解元次年春分三路類試自河以北至女真皆就燕關西及河東就雲中河以南就汴謂之府試試詩賦論時務策經義則試五道三策一論一律義凡二人取一榜首曰府元至秋盡集諸路舉人於燕名曰會試凡六人取一榜首曰敕頭亦曰狀元分三甲曰上甲中甲下甲敕頭補承德耶上甲皆賜緋七年卽至奉直大

夫謂之正郎第二第三人八年或九年中甲十二年下甲十三年不以所居官高卑皆遷大夫中下甲服綠例賜銀帶按金史選舉志不若此之簡而明故備錄之上甲但言第二第三人然則金之上甲亦猶今之一甲三名矣

試官密改試卷

宋釋文瑩湘山野錄云宋鄭公庠省試良玉不琢賦時
太宗胥內翰偃考之酷愛謂非二宋不能柰何重疊押韻一韻有瓌奇擅名及而無刻畫之名之句深惜之密與自改擅名爲擅聲後擢之於第一逮發試卷果鄭公

也按試官私改試卷功令所不許觀此知宋時已有此風矣

宋王明清揮麈後錄云張芸叟赴春試時馮當世主文柄以公生明爲賦題芸叟誤疊押明字榜出乃居第四元祐中芸叟以祕書監使契丹當世留守北門始修門生之敬置酒甚懽酒半當世曰京頃作知舉時祕監賦中重疊用韻以論策甚佳因自爲改去擢置優等尙記憶否芸叟方飲不覺杯覆懷中再三媿謝而去前輩成人之美如此

賣紙毬

宋王栻燕翼貽謀錄云景祐元年廢書判爲銓試書判雖有假手不可代書銓試雖他人代書可也承平時假手者用薄紙書所爲文揉成團名曰紙毬公然貨賣按此謂銓部試選人非謂禮部試士

明初會試中式人數

國朝朱彝尊靜志居詩話云吳伯宗名佑以字行金谿人洪武辛亥初開科帝親擢第一予嘗購得是科會試錄就試者一百八十九人中式一百二十人浙江三十一江西二十七福建二十一山西一十三北平六河南廣東各五陝西四山東五廣西高麗各一直隸止二人

考宋景濂會試錄稱先是京畿遵行鄉試中程式者七
十二未及貢南宮上求治之切皆采用之蓋庚戌京畿
所取士先會試而授之官矣按此可見明初會試之易
且高麗人亦與試而京畿所取士得先會試皆後來所
無也

明殿試甲第御筆親書

國朝朱彝尊靜志居詩話云定陵筆精墨妙嘗觀先文
恪公暨唐文恪公殿試卷御書第一甲第一名六字皆
瘦硬通神按此知明殿試卷天子親書甲第定陵乃明
神宗也

欽賜舉人

明王世貞鳳洲筆記云景泰中北京鄉試陳循王文以考官劉儼呂原抑其子訢於上謂儼私解元徐經及所取士顛倒詔覆試如初定惟陳王二相特各許其子一試時謂之欽賜舉人

明初南京太學生之重

明都穆談纂云應天府鄉試每科取中式舉人百三十五名其三十五名取白太學乃洪武舊制四明陳祭酒敬宗在南京時每值大比揭曉時隨門開入院親視填榜必取三十五名而後返若今日則不能然矣

鄉試錄前後序

明都穆談纂云鄉試有錄謂之小錄前必有序文余見三十年前小錄前後序凡三四篇今則惟前後二篇同考官不得作也按此則知明初同考官亦得作序不知何年改定今制

又云永樂四年登科錄第二甲在前列者亦得刊策今惟第一甲得刊永樂十年會試中庸一題刊義二篇今則題止一篇惟論或二篇耳按永樂甲申會試二甲前數名俱刊策已見續鈔第十

進呈錄用士子文

國朝王士禎香祖筆記云舊例科場進呈試錄主考官自撰程文其用士子文稍爲點定自萬曆十三年乙酉科始

歷代試期

欽定口下舊聞考引雅坪散錄云宋解試諸路並以八月五日鎖院而福建則用七月川廣則用六月以道遠故也南渡後閩廣改同諸路試期紹興二十四年有詔太學及諸路並以中秋日引試四川則用三月十五日焉元鄉試以八月二十日二十三日二十六日明改從八月九日十二日十五日元會試以二月一日三日五

日明改從二月九日十二日十五日元御試以三月七日明改從三月十五日蓋歷代鎖院爲期不同如是國朝王寶仁行年冠際云金陵書肆購得明宏治丙辰會試錄考試官爲謝遷王鏊同考試官十四人序云舊制鎖院以二月八日成化丙戌命先一日茲以社祀齋禁妨錫宴特命又先一日疑今之以初六日進院卽是例也按我朝會試改於三月自雍正五年始王東壁作此書在道光間乃於二月三月略不一說何歟

殿試定期

乾隆二十六年 御製四月二十五日御殿傳臚紀事

注云去歲以磨勘需日定于五月五日殿試初十日傳
臚念茲多士守候時久命速行磨勘于四月二十一日
殿試二十五日傳臚謹按殿試之期自明代至 國朝
屢有更易今定期二十一日自此始也因讀 欽定日
下舊聞考得此條恭錄之

殿試無門生

宋王明清揮塵前錄云劉器之晚居南京馬巨濟涓作
少尹巨濟廷試日器之作詳定官所取也而巨濟未嘗
修門生之禮器之以語客客以諷巨濟巨濟曰不然凡
省闈解送則有主文故所取士得稱門生殿試蓋天子

自爲座主豈可復稱門生於他人客告器之器之歎服
按今人於 殿試讀卷官皆稱門生蓋未知此義

宋王栻燕翼貽謀錄云開寶六年三月庚午御講武殿
覆試新進士宋準以下二百二十七人是歲禮部所放
進士十一人而已五經止二十二入藝祖皇帝以初御
試特優與取放以示異恩而御試進士不許稱門生於
私門一洗故習然則御試進士不得於私門稱門生宋
初固有明禁

減場中式

明都穆談纂云往時鄉試作減場亦得中式宣德十年

應天府鄉試吾鄉祝參政願以減場得高魁今則凡減場者皆貼出矣原注減場云前場七篇止作五篇

考試重書法

宋洪皓松漠紀問續云凡作字有點畫偏旁微誤者皆曰襍犯

明季童試重府取

國朝光緒蘇州府志引崑新志云明季童試最重府取府取有名卽可冀入設貧者以所取之名售人令頂替陳臺朱述善撰其妻周徇難始末自敘幼年以府取售人得葬其祖父三喪云

屢試第一不入學

國朝鄭方坤名家詩鈔小傳吳廷楨字山掄長洲人所居曰南村因自稱曰南村初名棟前後試有司者二十有三皆第一願不能博一衿按近時學使於府縣所定第一名皆取入學觀此知國初固不然也

又云一夕夢泥金報至以今名捷第八名進士醒而異之丙子秋陝士或援例入太學病不能至願得替人問其名則廷楨是觸前夢因借資入闈果獲雋榜後以異籍黜己卯南巡獻詩拔第一復鄉舉名癸未登科二甲第五名進士合一甲則適符所夢名數按借監入場

士林陋習觀此則名流亦復爲之

童生捐銀入學

國朝葉廷珩鵬陂漁話云許眉叟年譜紀康熙十六年丁巳魏象樞條陳入學每學四名餘俱捐銀一百十兩准入泮近時錢泳履園叢話亦紀康熙十七年戊午有旨令各直省童生每名捐銀一百兩准予入泮一科一歲後不爲例郡中舊家有藏國初以來入泮題名錄者專記蘇府長元吳四學入學新生額數姓名曾借閱之始知此例自戊午年科試至壬戌年歲試凡行四次先於丁巳年歲試卽裁定進額如蘇府學本二十名者

改作五名長吳二學本十五名者改作四名餘俱納銀
一百兩准作生員附後每學無定額常有七八十名或
百餘名之多以此類推各省各府州縣可見至辛酉科
試正額復舊而援納仍行及癸亥科試捐例始概行停
止蓋是時三藩叛亂命將出師不得不開此例以濟軍
需至二十二年海宇銷兵故例亦隨閉其每學四名實
依魏公所奏而捐銀百兩與原奏一百十兩不符當由
廷議核減耳或疑生員進由援納難免濫竽然觀題名
錄中吳荆山宗伯原注名士顧俠君太史原注名嗣立
世皆從捐生起家未可謂不得士矣按此事余於續鈔

卷十儒士觀場條已附載之今得其詳又記於此亦學
校中一故事也

北京貢院

明黃溥聞中今古錄云永樂中有親軍指揮三員曰紀
綱曰劉江曰袁剛上喜其名與音同號爲三綱紀後志
滿怙勢坐事伏誅籍沒夷族今北京貢院其遺址也

明王世貞錦衣志云燕王初起帥師蕩山東度臨邑臨
邑書生紀綱叩馬首請效王與語悅之旣卽位擢綱自
忠義衛千戶爲都指揮僉事治錦衣親兵復典治詔獄
又曰錦衣一禁校耳一重於紀綱再重於錢甯二重於

陸炳今讀御史院罪狀紀綱一疏其權勢之盛可見

明施顯卿奇聞類紀引庚巳編云南京貢院錦衣衛指揮紀綱宅也綱有寵於文皇帝朝後坐不法伏誅闔門受戮於此亦有生瘞其下者今每鄉試時舉子入院輒有聲自地中起歷諸號而止如萬馬騰踏者云按此則又爲今江甯府之貢院矣未知孰是

按明朱國棟湧幢小品云京師試院改舊禮部爲之乃正統年間事 國朝孫承澤春明夢餘錄云貢院在城東隅元禮部舊基也永樂乙未改爲貢院按此則北京貢院非紀綱舊宅矣

至公堂

國朝韓泰華無事爲福齋隨筆云元歐陽圭齋詩省垣東畔至公堂十五年前戰藝場係天歷庚午會試院中作也至公堂已久

宋洪皓松漠紀聞云試闈用四柱揭綵其上目曰至公樓主人登之以觀試此至公堂之權輿也

登第後拜客乘轎

國朝章有謨景船齋雜記云嘉靖以前吾鄉先輩登第歸皆徒步拜客但張蓋耳自嘉靖辛丑張公鶚翼約諸同年曰吾遲暮擬一第堪僕僕奔走邪諸公入里同用

三金三
三
轎背約者罰故轎自辛丑始按章載謀華亭人則此當是華亭故事然明初風俗之厚可以此推也

狀元母夫人游城

國朝潘曾沂小浮山人年譜云乾隆五十八年癸丑父親會試中式進士殿試第一甲一名授職修撰大母黃太夫人在籍循例游城

按狀元夫人撒穀余已載於續鈔卷十矣茲則狀元母夫人循例游城卽撒穀也蓋潘文恭公元配謝夫人於乾隆五十七年卒故母夫人代之耳

康熙庚戌科

國朝王應奎柳南隨筆云康熙庚戌會試得人之盛爲本朝第一理學則有陸公隴其李公光地名相則有王公揆直臣則有郭公琇廉吏則有邵公嗣堯宿學則有許公自俊周公陳俶錢公世燾是科典試爲柏鄉魏相國裔介合肥龔尙書鼎孳按余於道光庚戌科成進士上距康熙庚戌一百八十年矣緬懷盛蹟敬錄之

武三元

國朝徐承烈燕居續語云明末有王玉璧者仁和人崇禎己卯武解元至本朝順治壬辰會試第一殿試爲第一甲第一人官福建都督僉事時海寇鄭成功猖獗

玉璧屢立戰功擢陝西都督同知調天津總兵致仕年九十卒見浙江通志是武科亦有三元

茶香室三鈔卷十四

德清俞樾

夏歸藏

梁陶宏景真誥協昌期第一篇云大方諸之西小方諸上多有奉佛道者皆服五星精讀夏歸藏經按儒書夏易連山殷易歸藏此云夏歸藏未詳其說

箕子注易

宋史藝文志著龜類有三墳易典三卷注云題箕子注按叢鈔卷一第一條卽載箕子易當時不知何書今乃知卽三墳易典也惜今不傳其占法無考矣

正易心法

麻衣道者正易心法云卦序當先履而後小畜試辨之
一柔自姤變同人同人變履履變小畜小畜變大有猶
之一剛自復變師又變謙又變豫又變比此皆自然之
序也今謙在豫上則知履不當在小畜下又履與无妄
對義既以大畜反无妄而居下則知小畜反履而居下
無疑矣今序卦非宣尼旨失其本真也八體乃艮爲鼻
巽爲手耳蓋乾爲首坤爲腹天地定位也坎爲耳離爲
目水火相逮也艮爲鼻兌爲口山澤通氣也巽爲手震
爲足雷風相薄也此義皇八卦之應矣學者承誤效尤

其失至此按麻衣之易道家之書也然此一說頗似有理故錄存之

又云一六爲腎二爲肺三爲脾四爲肝五爲心又云初爻爲地上爻爲天二爻爲北五爻爲南四爻爲西三爻爲東天地四方每卦之體皆具此義是爲六虛按此亦異說

大過卦辭

晉干寶搜神記云揚州別駕顧球姊生十年便病郭璞筮得大過之升其辭曰大過卦者義不嘉冢墓枯楊無英華振動游魂見龍車身被重累嬰妖邪法由斬祀殺

靈蛇非已之咎先人瑕案卦論之可奈何按此等卦辭鄙俚已甚乃晉時已有之矣

鼎顛趾

宋沈括夢溪筆談補云古鼎中有三足皆空可容物者所謂鬲也煎和之法常欲渚在下體在上則易熟而不偏爛及升鼎則濁滓皆歸足中鼎初六鼎顛趾利出否謂濁惡下疑當作在下須先瀉而虛之九二陽爻方爲鼎實今京師大屠善熟彘者鈎懸而煮不使著釜底亦古人遺意也

卉服

明鄭露赤雅云南方草木可衣者曰卉服續其皮者有
句芒布紅蕉布續其花者有桐花布瓊枝布娑羅布其
精者曰娑羅龍段吉貝布桃花布南中千葉桃花似牡
丹穗長尺許織穗成布但過冬則散按禹時卉服尙未
必有此要亦其濫觴也

唐馮贄雲仙雜記云青齊間有一種桃花盛開時垂絲
至二三尺採之練以松脂遞相纏結織成鞋履寄往都
下人皆不辨何物自注所出云青州襪記按此亦卽桃
花布之類然則青州亦有之矣今無其物未知所言信
否

釋山桐

唐封演封氏聞見錄云兗州鄒繹山生梧桐土人云此桐所以異於常桐者此山大石攢倚石閒周回皆通人行山中空虛故桐木絕響以是珍而入貢也按繹山中空故有釋孔之號余已記於叢鈔十二今讀此又知繹山桐材卽以此而見異記之以補禹貢疏所未備

羽山

宋方勺泊宅編云自登州岸一潮渡海卽至島島有五所卽禹貢之羽山

朝涉

宋邵思姓解卓部朝下注云紂臣有朝涉按尚書斷朝涉之脛某氏傳曰冬月見朝涉水者謂其脛耐寒斬而視之正義謂其事或當有所出此則以朝涉爲人姓名更屬異聞矣

魯經

國朝周中孚鄭堂札記云宋鑑端平元年太常少卿兼侍講徐僑奏論語一書先聖格言乞以魯經爲名升爲早講從之論語之名甚古何必作此變更後惟王氏柏有魯經章句他人莫之從也

顏回問孝

宣和書譜云蕭子雲善正隸行草小篆飛白今御府所藏三正書有顏回問孝按顏回問孝不知出何書

擁縲子卽荷蕒

徐鍇說文通論云孔子擊磬於衛擁縲子聞之曰有心哉擊磬乎故於文耳磬爲聲殼古磬字也按以荷蕒爲擁縲子未詳所出

國朝陳倬敷經筆記云論語荷蕒不聞作擁縲蓋以縲爲孟子藁裡之藁藁亦草器故以荷蕒爲擁縲耳是卽楚金臆說之一證

蠶蠶卽蠶龜

孟子外篇靈龜隱於萊孟子使人問之以書注引丁公著云靈古蜺字按蜺從雨無意姑以廣異聞

湛子卽譚子

梁陶宏景真誥稽神樞第四篇云范安遠適云湛子不事齊齊師伐之春秋傳曰湛無禮也注云此則左傳上事湛字作譚國名也不知何故述此似有所指按此則春秋之譚子古有作湛子者矣

馮翼衣卽逢掖衣

宋郭若虛圖畫見聞誌云晉處士馮翼衣布大袖周緣以阜下加襴前繫二長帶隋唐朝野服之謂之馮翼之

衣今呼直綴注云禮記儒行篇衣逢掖之衣逢大也大掖大袂禪衣也逢掖與馮翼音近按今人知有逢掖不知有馮翼

賜儒行

元人事物紀原云宋朝會要曰淳化三年三月詔以新印儒行賜近臣先時御試進士日以儒行篇爲論題帝欲激勸士流敦儒行故特令雕印至是首賜新及第舉人孫何聖旨諭令依此修身爲治天聖五年四月賜新及第進士王堯臣以下禮記中庸各一本八年四月王拱辰以下又賜大學篇按今人知表章大學中庸二篇

自宋人始不知宋時又嘗別出儒行篇也

熙甯中王氏經學

宋邵博聞見後錄云東坡倅錢唐日答劉道原書云道原要刻印七史固善方新學經解紛然日夜摹刻不暇何力及此近見京師經義題國異政家殊俗國何以言異家何以言殊又有其善喪厥善其厥不同何也又說易觀卦本是老鶴詩大小雅本是老鷄似此類甚眾時熙甯初王氏之學務爲穿鑿至此

不讀春秋

宋無名氏道山清話云黃庭堅年五歲已誦五經一日

問其師曰人言六經何獨讀其五師曰春秋不足讀庭堅曰是何言也既曰經矣何得不讀十日成誦無一字或遺按今人往往不讀春秋經文觀此知宋時已然矣

四書繪

明徐渭青藤書屋集有四書繪序云四書中語言聖賢之精意也全體似人身有脈絡孔穴隱藏引帶不出字句而傳注講章轉相纏說未免牀上壘牀乃用五色筆繪之卽其本文統極章段字句凡輕重緩急或相印之處各有點抹圈鉤既以色爲號復造形相別色以應色形以應形形色所不能加乃始隱括數語脈穴之理自

謂庶幾燦然夫繪之與解均屬筌蹄但其異處雖渭序中不能自表也按文長此書必有可觀惜其不傳

經史對句

宋王明清揮塵後錄云明清於王岐公孫曉沒明處見岐公在翰苑時令門生輩供經史對偶全句十餘冊恨當時不曾傳之也

郊子之書

明焦竑國史經籍志道家有郊子說陰陽經一卷五行家有郊子占鳥經一卷是郊子亦尙有遺書邪

兵書論語

崇文總目兵家類有兵書論語三卷符彥卿撰按兵書名論語豈亦倣論語爲之邪

崇文總目醫書類又有法家論語一卷不著撰人是醫家亦有論語也

明焦竑國史經籍志兵家有武孝經一卷唐郭良輔撰臨戎孝經一卷員半千撰然則兵家不止有論語且有孝經矣

藥石爾雅

絳雲樓書目道書類有康眞彪藥石爾雅此必服餌之方也

白起兵書

崇文總目兵家類有白起神妙行兵法三卷白起亦有兵書傳世邪疑或後人所依託也

道德經有張魯本

明李日華六硯齋筆記云老子道德經有元師楊真人手書張鎮南本鎮南卽漢天師三代系師魯魏武帝表爲鎮南將軍者也

彩畫三輔黃圖

宋周密癸辛雜識云先子向寓杭收拾奇書太廟前尹氏書肆中有彩畫三輔黃圖一部每一宮殿繪畫成圖

三金口
極精妙可喜酬價不登爲衢人柴望號秋堂所得至元
斥賣內府故書於廣濟庫有彩畫本草一部極奇不知
歸之何人

韻海鏡源

唐封演封氏聞見記云顏真卿撰韻海鏡源成三百六
十卷其書於陸法言切韻外增出一萬四千七百六十
一字先起說文爲篆字次作今文隸字仍具別體爲證
然後注以諸家字書解釋旣畢徵九經兩字以上取其
句末字編入本韻爰及諸書皆倣此自有聲韻以來未
有如顏公此書也大曆二年入爲刑部尙書詣銀臺門

進上之宣付祕閣賜絹五百匹按此乃韵藻之權輿叢
鈔卷九謂宋袁穀韵類題選爲以韵隸事之始誤也
困學紀聞卷八云顏魯公在湖州集文士摭古今文字
爲韵海鏡源以包荒萬彙其廣如海自末尋源照之如
鏡崇文總目僅存十六卷今不傳按顏公此書宋人已
不得見非封氏此書無以知其體例矣近世箋注困學
紀聞者不知引此

觀文覽古

宋王明清揮塵後錄云仁宗卽位方十歲章獻明肅太
后命儒臣采摭歷代君臣事迹爲觀文覽古一書祖宗

故事爲三朝寶訓十卷每卷十事令傅姆輩日夕侍上
展玩之解釋誘進鏤版禁中哲宗九歲登極宣仁聖烈
皇后亦命取版摹印

金鑰金桴

宋謝伋四六談塵云四六全在編類古語唐李義山有
金鑰司馬文正亦有金桴王岐公最多

王子韶字解

宣和書譜云文臣王子韶字聖美浙右人方王安石以
字書行於天下而子韶亦作字解二十卷大抵與王安
石之書相違背故其解藏於家而不傳

謝皋羽所著書

明李日華六研齋二筆云謝皋羽嗜佳山水有浙東西游錄九卷又慨朋友道喪合同志姓名作許劍錄按許劍之義取之吳季子似施之逝者爲宜

王仲至家鎮庫書

宋徐度卻掃編云藏書之富莫如南都王仲至侍郎家其目至四萬三千卷其子彥朝云先人每得一書必以廢紙草傳之又求別本參較至無差誤乃繕寫之必以鄂州蒲圻縣紙爲冊以其緊慢厚薄得中也每冊不過三四十葉恐其厚而易壞也此本專以借人及子弟觀

之又別寫一本尤精好以絹素背之號鎮庫書鎮庫書不能盡有纔五千餘卷宣和中御前置局求書時彥朝已卒其子問以鎮庫書獻特補承務郎然其副本具在建炎初問渡江書盡留睢陽第中存亡不可知可惜也

明禮部韻會首公字韻

國朝張爾岐蒿庵閒話云大明集禮云國家以火德王故樂不用羽卽墨王邦直云本朝土德色尙黃當用宮徵商羽四調而去角洪武正韻以東字爲首角音也非所宜後禮部韻會改以公字爲首則宮音矣集禮本奉勅編纂而王說相左如此按此則明禮部韻會一東作

一公矣

永樂大典初本

國朝禮親王昭槲嘯亭續錄云皇史宬在東華門外迤南余於丁卯冬奉迎

純皇帝實錄曾一至其地

嘗聞徐昆山先生述李穆堂侍郎言其中藏全分永樂大典較翰苑所貯者多一千餘本蓋卽姚廣孝解縉所修初本繕寫精工非隆慶閒臆本所能及未審是書尙存否也

明張岱瑯嬛文集云永樂大典一書胡儀部青蓮先生尊人曾典禁中書庫攜出三十餘本一韻中之一字猶

不盡焉烈皇帝時廷議再抄一部計費十萬餘金遂寢其議按此則在明時此書已有爲人攜出者禁中未必有全書矣

永樂大典有僧預纂修

國朝朱彝尊靜志居詩話云善啟字東白號曉庵長洲人主蘇州永定寺尋主松江延慶寺授僧綱司副都綱預修永樂大典又云大同字妙止會稽人鄞縣延慶寺僧預修永樂大典按此則永樂大典一書方外勝流亦預纂修之列矣

律文小注

國朝朱彝尊靜志居詩話云姚思仁字善長秀水人萬
曆癸未進士歷尚書太子太傅公嘗注律以律文簡而
易晦乃用小字釋其下 本朝頒行 大清律實依公
所注本也

明史紀事本末

國朝葉延瑄吹網錄云明史紀事本末八十卷谷應泰
撰 四庫提要採邵廷采明遺民傳稱山陰張岱嘗輯
明一代遺事爲石匱藏書應泰作紀事本末以五百金
購請岱慨然予之孫氏讀書勝錄述姚際恆語云明史
紀事本末海昌一士人所作亡後爲某以計取攘爲己

書其事後總論一篇乃募杭諸生陸圻作每篇酬以十金始知其說起於姚立方庸言錄所謂某者卽指應泰惟海昌與張岱里籍不符然余嘗見鄭茵畦今水學略例內一條云朱竹垞先生語余曰谷氏紀事本末徐夔村著夔村諸生時爲谷識拔故以此報之竹垞與徐谷同時自必甚確是此書撰自徐倬而非張岱得由報贈而非竊冒似可信矣

按張岱瑯嬛文集有與周馥伯書云弟向修明書止至天啟以崇禎朝旣無實錄又失起居六曹章奏盡化灰燼草野私書又非信史是以遲遲以待論定今幸逢谷

霖蒼文宗欲作明史記事本末廣收十七年邸報弟於其中簸揚淘汰聊成本記並傳崇禎朝名世諸臣計有數十餘卷云云據此則谷氏張氏各自成書張氏之書且藉谷氏之力而成謂谷氏以五百金購之張氏者非矣張氏又親見谷氏著書則謂是徐蘋村所著亦未可信疑谷公著書招集浙中名士助之蘋村與陸圻或同預其役耳

華夏同音

無名氏東園友聞云杜清碧先生以翰林待制聘至杭有所編五聲韻自大小篆隸以至外化著書及國朝蒙

古新字靡不收錄曰華夏同音

仁書

國朝朱彝尊靜志居詩話云吳爾壘字介子崇德人崇
禎癸未進士死揚州之難平居撰死臣傳目曰仁書傳
有小序各繫以古人曰湛身曰焚曰炮烙曰炙曰自剄
曰不食曰閉口曰雉經曰扼吭曰立槁曰沒陣曰觸曰
墜曰鳩曰烹曰菹醢曰轢曰斬曰車裂曰磔曰鋸曰囊
撲曰剝曰剖曰拉曰杖曰笞曰錘擊曰刺曰幽曰凍曰
疽發背曰慟哭

滑耀編

國朝王士禎香祖筆記云袁淑山公九錫文沈約修竹
彈甘蕉文韓愈毛穎傳之類偶然遊戲作者遂多吾鄉
賈公三近嘗輯滑耀編若十卷又常見文府滑稽一書
皆此等文也

翦綃集

國朝王士禎香祖筆記云詩集句起於宋石曼卿王介
甫皆爲之李龔至作翦綃集然非大雅所尙

友錄稿

國朝朱彝尊靜志居詩話云陳體文字仲約平居詩不
留草其友花左室見輒手錄之故名友錄稿

詩有云得魚便覓酒有酒且留人如此卽爲樂何須復
苦貧無魚亦無酒宜主不宜賓如此卽高臥何愁不及
晨可謂達生之士矣

百家姓

宋王明清玉照新志云市井所印百家姓似是兩浙錢
氏有國時小民所著首云趙錢孫李蓋錢氏奉正朔趙
乃本朝國姓所以錢次之孫乃忠愍之正妃又其次則
江南李氏次句周尖鄭王皆武肅而下后妃無可疑者
按武肅王之祖母及母皆水邱氏今此書所列覆姓無
水邱氏何也

神童詩

國朝褚人穫堅瓠集云宋鄞縣汪洙字德溫九歲善詩賦上官奇而召見時衣短褐以進問曰神童衫子何短邪應聲曰神童衫子短袖大惹春風未去朝天子先來謁相公世以其詩詮補成集訓蒙爲汪神童詩後登元符三年進士仕至觀文殿大學士按汪洙宋史無傳未知他有可考否

堅瓠集又云神童詩一舉登科日句乃宋陳林贈王俊民登科詩時韓魏公亦贈詩云青雲一第人皆有白髮雙親世所無

呂氏千字文

國朝顧炎武亭林文集有呂氏千字文序曰崇禎之元有仁和卓人月者取千字文更次之以紀先帝初元之政呂君以爲事止於一年未備也再取而次之明代三百七十年之事乃略具其首曰大明洪武受命配天其末曰臣呂章成頓首敬書按呂君字裁之餘姚人此文必極工巧今未知尙有傳本否

二十四孝

國朝韓泰華無事爲福齋隨筆云坊間所刻二十四孝不知所始後讀永樂大典乃是郭守敬之弟守正所集

謝應芳龜巢集有二十四孝讚序云常州王達善所讚二十四孝以孝經一章冠於編首蓋別是一書

袁氏功過格

國朝朱彝尊靜志居詩話云袁黃字坤儀嘉善人萬曆丙戌進士除寶坻知縣遷兵部主事導人持功過格鄉里稱爲愿人其說實本愛禮先生劉駟加發揮焉然順親友兄弟皆自居爲功終於心未安君子之學無伐善可矣按今婦豎皆知有袁了凡而名字有莫能舉者矣至愛禮先生則知者更罕

村校中小兒所誦詩

宋葉夢得避暑錄話云村校中教小兒誦詩多有心爲
明時盡君門尙不容田園迷徑路歸去欲何從一篇初
不知爲誰作大觀間三庫曝書昭文庫壁間有敝篋置
書數十冊其一曰玉堂新集載此篇乃劉幽求詠懷作
也按此等書乃今村塾所課神童詩之類

太公家教

宋王明清玉照新志云世傳太公家教其言極淺陋鄙
俚然見唐李習之文集至以文中子爲一律觀其中猶
引周漢以來事當是有唐村落間老校書爲之太公者
猶曾高祖之類非涓濱之師臣明矣按太公家教余已

記於續鈔十三今觀此乃得其詳也